



KOMUNIKADO PA PRENSA

Fecha

3 juni 2013

Account Manager

Jhanirha Anita

Email

jhanirha.anita@gobiernu.cw

Nr.

MINISTER INTERINO BALBORDA TA FIRMA

AKUERDO HISTORIKO PA DEPARTAMENTU DI INSPEKTORNAN MÉDIKO NA OUTORIDAT DI AVIASHON SIVIL DI KÒRSOU

Willemstad - Minister Interino di Tráfiko, Transporte i Planifikashon Urbano señor Earl Balborda resientemente a firma un akuerdo di sumo importansia pa aviashon di Kòrsou. Pa promé bes den historia di aviashon, e Outoridat di Aviashon Sivil di Kòrsou lo disponé di un departamentu médiko. Minister Interino Balborda, den su afan pa halsa kalidat di aviashon i hasi nos aviashon mas sigur, ta sumamente satisfecho ku e logro aki.

Un departamentu médiko ta hopi importante den e mundu di Aviashon pasombra e inspektornan médiko den e departamentu aki ta mantené supervishon riba e médikonan ku ta kùr pilotonan, air traffic controllers i e mekánikonan pa wak si nan ta kumpli ku reglanan internashonal riba área di aviashon médiko.

E logro aki ta debí na resultado di negosiashonnan ku a tuma lugá entre Gobièrnu di Kòrsou i Gobièrnu Hulandes, pa di e forma aki pone e promé paso pa e instalashon di e departamentu aki.

Den yanüari 2012, Federal Aviation Administration (FAA), kual ta e Outoridat di Aviashon Sivil Merikano, a tuma e desishon di degradá Kòrsou pa kategoria 2 a base di un inspeksion ku a hasi na Kòrsou na Sèptèmber 2011. Durante di e inspeksion a resultá ku Kòrsou no tabata kumpliando ku tur e eksigensianan di aneksonan 1, 6 i 8 di e asina yama tratado di Chicago. E tratado aki tei pa garantisá seguridat di aviashon internashonal.

FAA ta kategorisá paisnan sea ku kategoria 1) kual ta nifiká ku e pais ta kumpli ku tur e eksigensianan òf kategoria 2) kual ta nifiká ku e pais no ta kumpli ku tur e eksigensianan. No ta eksistí un kategoria 3 i ta e pais ta ser degradá i no su aeropuerto. Aktualmente, Kòrsou komo pais ta kategoria 2.

Ku e logro importante aki, esta introdukshon di e departamentu mediko, Minister Interino Balborda ta demonstra ku Gobièrnu ta trahando duru pa asina kumpli ku tur e eksigensianan di FAA i pone Kòrsou bek na kategoria 1 mas pronto posibel.

Pueblo di Kòrsou por sigui tur último desaroyonan di Minister Balborda di Tráfiko, Transporte i Planifikashon Urbano via di su página di Facebook 'Earl W. Balborda, Minister VVRP'.